

Direktor SIPA na sjednici Nezavisnog odbora PSBiH

POVRATNICI IZ SIRIJE SU POD PRISMOTROM



Stanić: Naši sugrađani nisu umiješani u napade u Parizu

- O detaljima ne mogu pričati, kaže Stanić
- Dva zaključka o odgovornosti Vilića

Direktor Državne agencije za istrage i zaštitu (SIPA) Perica Stanić izjavio je jučer, u svjetlu terorističkog napada u Parizu, da se ova agencija stavila na raspolaganje Ambasadi Francuske u BiH, u vidu vršenja provjera preko INTERPOL-a za određena lica i vozila.

Najgnusnije laži

- Sretna okolnost je da nema naših sugrađana umiješanih u teroristički napad u Parizu, niti stranih državljana koji su eventualno ovdje boravili, kazao je Stanić.

Kada su u pitanju prijetnje na pojedinim internet-stranicama

koje egzistiraju godinama, direktor SIPA naglasio je da je Tužilaštvo BiH obaviješteno i zna za portale koji pozivaju na terorističke napade ili ih veličaju, te da SIPA u saradnji sa Tužilaštvom poduzima određene mjere, odnosno pokušava utvrditi identitet lica koja uređuju sadržaj takvih portala.

- Svi ti portali i blogovi se uređuju van naše zemlje i Tužilaštvo će odrediti šta je za njih najadekvatnija mjera. Kada su u pitanju domaći portali i neprimjereni komentari, osjetio sam na svojoj koži da vas ocjenjuje neko ko vas nikad nije vidio u životu i iznosi najgnusni-

Page: 2

Reach: 0

Country: BOSNIA AND HERZEGOVINA

Size: 519 cm2

2 / 2



Data podrška rukovodstvu SIPA

je laži, međutim, da li ovdje ima nadležnosti agencije čiji sam ja direktor, diskutabilno je, kazao je Stanić, dodavši i da su osobe koje su povratnici sa stranih ratišta pod određenim mjerama prismothe.

- Znamo koja su to lica, neki su već procesuirani, a protiv određenog broja lica se vodi istraga. To je ono što vam mogu reći, konkretnije detalje mjera koje preduzimamo nisu za javnost, zaključio je Stanić.

Istakao je da je broj takvih lica, povratnika s ratišta u Siriji, između 40 i 50. Stanić je jučer sa svojim zamjenikom Đurom Kneževićem prisustvovao sje-

dnici Nezavisnog odbora PSBiH, na kojoj je razmatrana informacija o stanju u SIPA. Prvi zamjenik Odbora Enes Obralića kazao je po završetku sjednice da su rukovodioci SIPA iznijeli svoj presjek stanja.

- Ono što smo mi željeli jeste da damo punu podršku rukovodstvu agencije i da izrazimo naše zadovoljstvo njihovom međusobnom saradnjom. Otvoreno je i pitanje kadroviranja u SIPA. Postoji jasna spremnost u radu ove agencije u borbi protiv terorizma i organiziranog kriminala. Međutim, u ovoj borbi važno je i ko će vršiti taj rad. Imamo uvjeravanja di-

rektora da će on vrlo brzo sagledati i taj segment rada i postaviti najbolje profesionalce na ključne pozicije. To je u skladu sa zaključkom Vijeća ministara BiH donesenim prije godinu i po, po kojem su obavezni direktori policijskih struktura da prije svega u rukovodnom dijelu osiguraju nacionalnu zastupljenost prema popisu stanovništva, poručio je Obralića.

Nezavisni odbor jučer je ponovo razmatrao i inicijativu ministra sigurnosti BiH Dragana Mektića u kojoj se traži da se ispita odgovornost između ostalih i Mirsada Vilića, direktora Direkcije za koordinaciju policij-

skih tijela BiH, u vezi s napadom na srbijanskog premijera Aleksandra Vučića 11. jula ove godine u Potočarima.

Informacije iz Tužilaštva

- Usvojena su dva zaključka. Nezavisni odbor će uputiti Tužilaštvu BiH akt u kojem ćemo ih zamoliti da nam dostave određene informacije u kojoj fazi i ko je predmet istrage. Drugi zaključak je da ćemo sačekati te informacije i da ćemo se o inicijativi ministra naknadno izjasniti, kazao je Obralića, dodajući da očekuju da im odgovor iz Tužilaštva bude dostavljen naredne sedmice. **A. GRABOVAC**